



BVgislaus filius fuit Erici ducis Pomeraniæ ex Sophia uxore. Hic cum foelici esset ingenio præditus, in bonis literis educatus fuit, eo proposito, ut aliquãdo sacris initiaretur. Cum itaq; Ericus cum fratre Vuartislao sine alijs hæredibus Anno 1497 decessissent, Marchio Brandenburgicus eam regionem occupare statuerat. Itaq; cum Stetinsibus de hac re agere cœpit. Verùm ipsi Bugislaũ, qui ad Rugisuald operam studijs nauabat, domũ reuocarunt, atq; adhortati sunt, ut alijs rebus relictis auitas ditiones administrandas susciperet. Itaque Bugislaus eorum consilium secutus rerum gubernacula adiit, atq; primò Margarethã marchionissam, deinde Annam regis Poloniæ Cazimiri filiam uxorem duxit. Fuit is egregius princeps, atq; pietati & uirtutibus deditissimus. Vnde apud pontificem Alexandrum sextum impetrauit, ut Pomeraniæ principes posthac suæ regionis Episcopum nominare & constituere possent. id quod tum singulare priuilegium ducebatur. Cum hoc modo Bugislaus totã Pomeraniam per 30 annos magna laude gubernasset, anno 1527 obiit, atq; Barnimũ filium successorem reliquit. Monst. lib. 3. Cosmog. de Germania,